



БУЛГАН АЙМГИЙН ЗАСАГ ДАРГЫН
ЗАХИРАМЖ

2022 оны 04 сарын 21 өдөр

Дугаар 7/268

Булган сум

“Чанарыг эрхэмлэгч” шагнал олгох
журам батлах тухай

Монгол улсын засаг захиргаа, нутаг дэвсгэрийн нэгж, түүний удирдлагын тухай хуулийн 60 дугаар зүйлийн 60.1.1, 66 дугаар зүйлийн 66.1, Жижиг, дунд үйлдвэрийг дэмжих тухай хуулийн 18 дугаар зүйлийн 18.2 дахь хэсэг, Засгийн газрын 2019 оны 156 дугаар тогтоол “Жижиг, дунд үйлдвэрийг дэмжих үндэсний хөтөлбөр”-ийн 4.6.5, аймгийн Засаг даргын 2021 оны А/223 дугаар Захирамжийн 3.4 дэхь заалтуудыг тус тус үндэслэн ЗАХИРАМЖЛАХ нь:

1.Хэрэглэгчдийг чанартай, аюулгүй, баталгаатай бүтээгдэхүүн, үйлчилгээгээр хангах, орон нутгийн үйлдвэрлэлийн бүтээгдэхүүний өрсөлдөх чадварыг дээшлүүлэх, Брэнд бүтээгдэхүүнийг бий болгоход идэвхи санаачлагатай ажиллаж байгаа аж ахуйн нэгж, байгууллагыг хөхүүлэн дэмжих, олон нийтэд сурталчлан таниулах, чанарын талаархи мэдлэгийг дээшлүүлэх зорилгоор Засаг даргын нэрэмжит “Чанарыг эрхэмлэгч” шагнал олгох журмыг хавсралтаар баталсугай.

2.Болзолын шалгуур үзүүлэлтийн шаардлага хангасан үйлдвэрлэл үйлчилгээ эрхлэгчдэд “Чанарыг эрхэмлэгч” шагналыг “Үндэсний чанарын өдөр”-өөр гардуулах, олон нийтэд сурталчилах арга хэмжээг зохион байгуулан ажиллахыг “Тогтвортой хөгжил-түншлэлийн зөвлөл (Д.Жаргалсайхан), Стандарт, хэмжил зүйн хэлтэс (Ц.Бүрэнтуяа)-д үүрэг болгосугай.

3.“Чанарын эрхэмлэгч” шагналын зардал 3 000 000 (гурван сая) төгрөгийг жил бүрийн орон нутгийн төсөвт тусгаж, зарцуулж байхыг аймгийн засаг даргын Тамгын газрын дарга (Д.Алтаншагай), Санхүү, төрийн сангийн хэлтсийн дарга (Д.Батцогт) нарт даалгасугай.

ЗАСАГ ДАРГА  Б.АРИУН-ЭРДЭНЭ



6320220317



Аймгийн Засаг даргын 2022 оны 04 сарын
41. өдрийн 41/2022 Тоот Захирамжийн хавсралт

АЙМГИЙН ЗАСАГ ДАРГЫН НЭРЭМЖИТ “ЧАНАРЫГ ЭРХЭМЛЭГЧ” ШАГНАЛ ОЛГОХ ЖУРАМ

Нэг. Нийтлэг үндэслэл

Хэрэглэгчдийг чанартай, аюулгүй, баталгаатай бүтээгдэхүүн, үйлчилгээгээр хангаж, орон нутгийн бүтээгдэхүүн, үйлчилгээний өрсөлдөх чадварыг дээшлүүлэх талаар санаачилга гаргаж, тодорхой үр дүнд хүрсэн аж ахуйн нэгж, байгууллагыг “Чанарыг эрхэмлэгч шагнал”-аар шагнаж урамшуулахад энэхүү журмыг мөрдөнө.

Хоёр. Зорилго

Хэрэглэгчдийг чанартай, аюулгүй, баталгаатай бүтээгдэхүүн, үйлчилгээгээр хангах, орон нутгийн бүтээгдэхүүний өрсөлдөх чадварыг дээшлүүлэх, Брэнд бүтээгдэхүүнийг тодорхойлж, энэ чиглэлээр манлайлж байгаа аж ахуйн нэгж, байгууллагыг хөхүүлэн дэмжих, олон нийтэд сурталчилан таниулахад “ЧАНАРЫГ ЭРХЭМЛЭГЧ” шагналын зорилго оршино.

Гурав. Чанар эрхэмлэгчийн шагнал олгох

3.1.“Чанарыг эрхэмлэгч” шагнал нь цом, батламж, 3 000 000 /Гурван сая/ төгрөгийн шагналын сангаас бүрдэнэ.

3.2.“Чанарыг эрхэмлэгч” шагналыг дараах чиглэлээр жилд 1 удаа олгоно.

- Бүтээгдэхүүн
- Үйлчилгээ гэсэн төрлөөр шалгаруулж аж ахуйн нэгжид “Чанарыг эрхэмлэгч шагнал”-ын цом, батламж, мөнгөн шагнал олгоно.

3.3.Чанарыг эрхэмлэгч шагнал олгох үйл ажиллагааг аймгийн засаг даргын Тамгын газар, Стандарт, хэмжил зүйн хэлтэс, Хүнс, хөдөө аж ахуйн газар, Мэргэжлийн хяналтын газар, аймгийн Засаг даргын дэргэдэх “Тогтвортой хөгжил-түншлэлийн зөвлөл” хамтран жил бүрийн “Үндэсний чанарын долоо хоног”-ийг тэмдэглэх арга хэмжээний үеэр зохион байгуулна.

3.4.“Чанарыг эрхэмлэгч шагнал”-ын шалгаруулалтыг зохион байгуулах тухай зарыг шагнал гардуулах өдрөөс 30-аас доошгүй хоногийн өмнө зарлаж аймгийн засаг даргын Тамгын газрын албан ёсны цахим хуудас болон бусад мэдээллийн хэрэгслээр олон нийтэд мэдээлнэ.

Дөрөв. “Чанарыг эрхэмлэгч шагнал”-ыг олгох шалгаруулалтын үйл ажиллагаа

4.1.“Чанарыг эрхэмлэгч” шагналыг олгох анхан шатны шалгаруулалтыг Баталгаажуулалтын орон тооны бус зөвлөлөөр /ЗДТГ, ХХААГ, СХХ, МХГ-ын төлөөлөл оролцсон/, эцсийн шалгаруулалтыг аймгийн Засаг даргын зөвлөлийн хурлаар хэлэлцүүлнэ.

4.2.Энэ журмын 4.1-д заасан шалгаруулалтыг үндэслэн “Чанарыг эрхэмлэгч шагнал”-ыг Чанарын өдрийг тэмдэглэх арга хэмжээний үеэр олгоно.

4.3.Энэхүү журмын 5 дугаар зүйлд заасан нэр дэвшигч байгууллагад тавигдах нийтлэг шаардлагад нийцүүлэн бүтээгдэхүүн, үйлчилгээний төрлөөс шалгаруулж, чанарыг эрхэмлэгч шагнал олгох шаардлагыг тогтооно.

4.4.Стандарт хэмжил зүйн хэлтэс нь чанарыг эрхэмлэгч шагналын шалгаруулалтад нэр дэвшигч байгууллага, аж ахуйн нэгж, иргэнээс ирүүлсэн материалыг хүлээн авч, энэхүү журмын 5 дугаар зүйлд заасан шаардлагыг хангаж байгаа эсэхийг нягтлан, баримтжуулна.

4.5.Шалгаруулалтад ирүүлсэн баримт бичгийг архивын нэгж болгон хадгална.

4.6.Шалгаруулалтыг энэхүү журмын 5 дугаар зүйлд заасан нийтлэг шаардлагыг баримтлан явуулна.

Тав. Чанарыг эрхэмлэгч шагналын шалгаруулалтад нэр дэвшигч байгууллагад тавигдах нийтлэг шаардлага

5.1.Тухайн чиглэлээр 3-аас доошгүй жил тасралтгүй үйл ажиллагаа явуулсан байх.

5.2.Бүтээгдэхүүн, үйлчилгээ, үйл ажиллагаа нь хэрэглэгчийн хэрэгцээ шаардлагад нийцсэн, чанар аюулгүй байдлыг хангасан нь Тохирлын гэрчилгээгээр баталгаажсан байх.

5.3.Мэргэжлийн хяналтын газрын холбогдох хяналтын хуудасны нийт онооны 29 хувь буюу түүнээс бага хувьтай тэнцэх оноо авч, бага эрсдэлтэй буюу хууль тогтоомж зөрчигдсөнөөс хүний амь нас, эрүүл мэнд, хүрээлэн байгаа орчин, нийгмийн аюулгүй байдалд учруулж болзошгүй сөрөг үр дагавар үүсэх магадлал бага гэсэн ангилалд хамрагдсан байх.

5.4.Байгаль орчны нөлөөлөх байдлын үнэлгээ хийлгэсэн байх

5.5.Үйл ажиллагаандаа чанарын болон байгаль орчны, хүнсний аюулгүй байдлын тогтолцоо нэвтрүүлсэн, органик үйлдвэрлэл эрхлэгчээр гэрчилгээжсэн бол давуу тал болох.

5.6.Ажлын байрыг нэмэгдүүлсэн (нотолгооны хамт ирүүлэх) байх.

5.7.Нийгмийн хариуцлагын хүрээнд 2-оос доошгүй арга хэмжээг санаачлан зохион байгуулсан байх.

5.8.Холбогдох хууль, тогтоомж, техникийн зохицуулалт, стандартыг чанд мөрддөг байх.

5.9. Тамхи, согтууруулах ундааны үйлдвэрлэл эрхэлдэггүй байх.

5.10. Байгаль орчинд ээлтэй техник технологи, арга ажиллагаа, нэвтрүүлэн байгалийн нөөцийг хэмнэлттэй ашигласан байх.

5.11. Бүтээгдэхүүнд дараах нэмэлт шаардлагыг тавина.

1.Экспортыг нэмэгдүүлэх чиглэлээр тодорхой үр дүнтэй арга хэмжээ авч ажилласан байх

2.Импортыг орлох бүтээгдэхүүн үйлдвэрлэж зах зээлд нийлүүлж хэрэглэгчдэд танигдсан байх.

5.12. Байгууллага нь шагнуулах тухай хүсэлт, дор дурьдсан холбогдох баримт бичгийг бүрдүүлж зарласан хугацаанд Стандарт хэмжил зүйн хэлтэст ирүүлнэ:

5.12.1 Аж ахуйн нэгжийн гэрчилгээний хуулбар;

5.12.2 Үйл ажиллагаа эрхлэх тусгай зөвшөөрлийн хуулбар;

5.12.3 Мэргэжлийн байгууллагаас олгосон (энэхүү журмын 5.2- 5.4-т хамаарах) гэрчилгээ, хяналтын хуудас, үнэлгээний хуулбар;

5.12.4 Дараах мэдээллийг агуулсан байгууллагын тайлан, танилцуулга. Үүнд:

1/ажлын байр нэмэгдүүлсэн, боловсон хүчнийг хөгжүүлэх бодлогын сүүлийн 3 жилийн хэрэгжилт;

2/хэрэглэгчийн сэтгэл ханамжийн судалгааны сүүлийн 1-ээс доошгүй жилийн мэдээлэл;

3/бүтээгдэхүүн нь сав баглаа боодол, хаяг шошгын стандартыг бүрэн хангасан байх ба орон нутгийн онцлогийг тусгасан байна.

5.13. Шаардлагатай тохиолдолд 5.12-д заасан баримт бичгийн хүрээнд нэмэлт материалыг шаардаж болно.

Зургаа. Санхүүжилт

6.1. Чанарыг эрхэмлэгч шагнал олгох үйл ажиллагааг зохион байгуулах зардлыг дараах эх үүсвэрээс санхүүжүүлнэ:

- Орон нутгийн төсөв (Жижиг, дунд үйлдвэрлэлийг дэмжих хөтөлбөрийг хэрэгжүүлэх төсөвт тусгана.)
- Улсын төсөв
- Төсөл хөтөлбөр